



Les freres de Ioseph sont arrestez, à cause qu'au sac de Benjamin est trouuée la coupe de Ioseph.

A PRES que Ioseph eut festoyé ses freres, lesquels ne le connoissoient point, il commanda d'emplir leurs sacs de viures, & de remettre encore à chacun des sacs leur argent, & que dedans le sac du petit Benjamin on mist secrettement la coupe d'argent, & l'argent de son froment; ce qui fut fait. Et le matin venu, ils partirent, & on les laissa aller iusques hors la Cité: mais Ioseph enuoya apres son Maistre d'Hostel; & suiuant ce qu'il auoit commandé, ils furent arrestez par le Commis, qui leur dit rudement; *Meschantes gens, pourquoy auez-vous rendu mal pour bien? Vous auez dérobé la coupe en laquelle boit Monseigneur, c'est laschement fait à vous.* A quoy ils répondirent, *Ja à Dieu ne plaise, que vos seruiteurs ayent commis telle chose, car mesme l'argent qu'auions trouué en nos sacs, nous l'auons rapporté. Et comment déroberions-nous à vostre Maistre, or ou argent? nous voulons demeurer serfs à iamais, si nous auons fait ce tort.* Et le Commis leur dit, *Qu'il soit ainsi fait selon vos paroles.* Adonc fit foüiller au sac d'vn chacun, l'vn apres l'autre, & en celuy de Benjamin fut trouuée la coupe de Ioseph, dont de fascherie, Iuda & tous ses freres furent si troublez, qu'ils rompirent leurs vestemens, & furent honteusement menez captifs en la Cité.